



Gutpela Wasman

No 1/2019

**Jisas Krai i tok,
“Mi gutpela wasman
bilang sipsip.”**

Jon 10.11

Kirapim na strongim narapela

Noken Lusim

Ignas Jan em i wanpela saveman tru bilong pilai piano. Wanpela taim em i gat wokmak long pilai piano insait long wanpela bikpela haus bung long Amerika. Dispela bung em bilong tingim ol bikpela mani na ka bilong ol mani manmeri (biksot). Nau em taim bilong biksot na ol mani manmeri i werim ol bikpela mani klos.

Namel long ol manmeri i gat wanpela mama wantaim pikinini i gat 9-pela krismas. Liklik boi i no amamas long sindaun isi. Tasol mama i laik bai pikinini i ken harim dispela saveman i pilai na em bai i gat laik tu long lainim na pilai piano bihain. Taim mama bilong em i tanim na i toktok wantaim ol pren bilong em, liklik boi i kirap na wokabaut i go sindaun long sia bilong piano na stat long pilai piano. Ol manmeri i lukim na ol i no amamas, ol

i bel hat na singaut, “Em pikinini bilong husait? Rausim em i go, mama bilong em i stap we? Inap wanpela stopim em?”

Saveman bilong piano i harim pinis na hariap tru em i kam na pilai wantaim boi long mekim music bilong tupela i krai gut tru gen. Na em i wok long tokim boi olsem, “Noken stop, pilai yet, pilai yet, noken stop, noken lusim.”

Na wankain long yumi tu. Ol wok na plen bilong yumi i olsem nois boi i bin wokim long piano. Yumi laik lusim, tasol Jisas i kam na tok. Noken givap, noken stop, noken lusim. Mi stap wantaim yu, Jisas i save helpim yumi taim yumi i no inap.



Soim gutpela rot long kamap nais


Kay na Karen i lap wantaim na tupela i wokabaut i kam daun long lata.

Tupela i werim olupela kep na klos bilong mama bilong tupela, em i longpela stret na ol stail su bilong mama. Tupela i hat long werim ol su bilong mama.

Tupela i lap taim tupela i harim olsem mama i kam long lukim wanem samting tupela i mekim. Taim mama i lukim tupela gel bilong en, em i lap wantaim na i tok, “Em ol naispela olupela klos bilong mi. Yutupela i luk pani bikos nau ol i no werim dispela kain klos moa. Klos i senis. Tasol mi save long wanpela rot bilong bilasim bodi. Dispela rot i no inap senis na i no inap kamap lapun tu.”

Mama i skulim tupela long bilasim ausait bodi em i orait tasol bilasim insait spirit bilong yumi em i moa gutpela. God i save lukim insait bilong yumi. Em i no save lukim

ausait bodi bilong yumi o wanem kain ol klos yumi i save werim.




Tupela gel i askim, “Mama bai mitupela i bilasim insait olsem wanem?”

Mama i tokim tupela, “Baibel i tok insait long bodi bilong yumi em spirit na tewel i stap. Olsem na yumi mas bilasim gut insait. Bikpela Jisas i givim pinis gutpela klos bilong bilasim insait em pasin bilong laikim tru ol arapela, bel gut, bel isi, amamas na planti ol gutpela pasin moa i stap bai yumi mekim tu.”

Kay i lukluk long su na ol arapela klos em i werim na i tok, “Em i rong olgeta long mi mas luk nais ausait.” Mama i tok, “Nogat. Em i no rong tasol em i no impoten.”

God i save amamas long ol pikinini i save bilasim gut insait wantaim gutpela pasin na God i save laikim ol tru long mekim ol dispela pasin gen na gen.



Kirapim narapela

Nem bilong mi Alex Tana na mi bilong Buka. Mi kamap long wanpela famili we mi i gat tupela susa na wanpela brata. Mama na las susa bilong mi i save lotu long God. Mi wantaim ol arapela na papa i no save lotu long God.

Wanpela taim long moning mama i tokim mi olsem Ien bai i kisim lotu long Sande. Long dispela wik Sarere mi yet i bin spak nogut tru na i kam slip i stap. Moning mama i kirapim mi na i tok, “Mipela i go long lotu nau.” Mi redi na bihainim tupela mama na susa i go long lotu.

Taim mipela i go insait long lotu, mi lusim tupela na mi bin sindaun long wanpela kona long baksait tru. Long dispela taim Ien i go antap long fulfit na i autim tok. Em i wok long autim tok yet na insait long tok mi bin kisim wanpela tok em Jon 6.37b. “Man i kam long mi, mi no inap tru long rausim em.” Dispela ves i stat long kotim bel bilong mi.

Mi tingting long i go long dispela ples we Ien i bin go long en. Na tingting bilong mi i pas pinis long i kam long Timil Wagi Baibel skul long Jiwaka.

Na long wanpela moning Ien i bungim mi na mekim stori long Timil Wagi Baibel



Skul i save wok olsem wanem. Na dispela i mekim bel bilong mi i amamas tru long harim na mi tingting long kam. Bihain long wik i kam ol famili i wanbel long salim mi i kam long Baibel Skul.


God i helpim na sampela rot i op na tupela pasto manmeri i kam long Lae na mipela i kam wantaim. Bihain mi i go long Komperi na i go olgeta long Timil Wagi Baibel Skul long Janueri 2016.

Na mi bilip olsem taim mi i go bek long asples bilong mi bai planti i kam long wankain rot (Stat 28.15).

Alex Tana
EBC Buka




.... bel isi, serim ol samting, toktok isi wantaim ol arapela....




Pasel Taim

Yumi laik helpim dispela liklik boi i ken luksave long stretpela rot long bihainim. Dispela rot em i bilong kirapim na strongim narapela long sanap strong long bilip. Taim liklik boi i kamap gut long narapela sait, God yet bai kisim biknem long laip bilong dispela boi. Em i no save long rot, inap yu soim rot long em?



STAT HIA

Memori ves



Yupela i no ken larim ol kain kain tok nogut i kamap long maus bilong yupela. Nogat. Gutpela tok tasol i mas kamap, inap long strongim ol man i slek. Dispela kain tok i save bringim marimari bilong God i kam long ol man i harim.

Efesus 4.29

Guwa tim i laik tok tenkyu long brata i raitim stori i kam - Alex Tana EBC Bougainville. Tupela stori i kam long dispela tupela buk, "More Little Visits With God" na "Stories for the Heart". Translated by Guwa team.



Published and printed by:
Publications Department
Evangelical Brotherhood Church (Inc.)
P.O. Box 996, Lae 411, Papua New Guinea

No 1/2019